

Date – 17/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Tui hri nia hriat leng mekah Lawngtlai Bawrhsap chuan nimin khan Kakichhuah a tlawh a, hrilengin ziaawm lam a pan tawh a ti.
2. Nimin kha National Press Day a ni a, Pathianni a nih avangin vawiinah he ni hi lawm a ni ang.
3. National Investigation Agency (NIA) chuan Red Fort-a Car puak an chhuinaah hlawhtlinna ropui tak changin mawhphurtute zinga pakhat nimin khan an man.
4. External Affairs Minister Dr.S. Jaishankar-a chuan Amir Of Qatar, Tamim bin Hamad Al Thani chu Doha khawpuiah a kawm.

<><><>

DC VISIT KAKICHHUAH

Tui hri nia hriat leng mekah Lawngtlai Bawrhsap chuan nimin khan Kakichhuah a tlawh a, hmalakna hrang hrang leh an dinhmun tlangpui a enfiah.

Pu Donny Lalruatsanga chuan hri leng mek vanga nunna ch  n lai an awm chu paw   a tih thu sawi  n, hrileng darh lo tura chak taka hmalak chhunzawm zel a nih thu a tarlang a. Bawrhsap chuan 'Containment Area ' a puan a nih tawh angin, dan leh thupek zawm kawngah thuawih taka awm turin a chah a. Tun dinhmunah Myanmar lam nen inkalpawh chu thla hnih chhung atan khap tlat a ni a, in lenpawh pawh khap tlat a nih angin tha taka zawm a pawimawh hle a ti. Sumdawng emaw thildang vanga ramri pela kal lui an awm a nih chuan na taka hremna pek an nih tur thu tarlangin, VC, YLA leh LWA - te chu tha taka lo venpui turin a sawm nghal a ni.

Pu Donny Lalruatsanga chuan inenkawl  na kawngah mamawh zualpui ORS, IV Drip leh a tul dangte pek chhunzawm zel an nih tur thu a sawi a. Health Worker leh Medical Team- ten an thutchilh reng angin, thlaphang lo tur leh an thu lo zawm tha turin a chah a. Hri kai leh vei awmdan chu thla khat chhung uluk taka vil chhunzawm reng a ni ang a ti. December ni 1- ah LADC inthlan tura Polling party- te an kal tawh dawn avangin, thupek zawma, inenkawl  na tha nei tur a khaw mipuite tan la thar turin a ngen a. Faina leh thianghlimna lo ngaipawimawh a, 'containment area' a puan pawh hlih thuai a

nih theih nan a thahnem ngai taka thawhpui turin a sawm nghal a. Bawrhsap chuan khawtlang hruaituten an ngen angin, ei leh in bakah damdawi lam a mamawh an neihte pek a nih tur thu a tarlang nghal bawk. Lawngtlai District Hospital Medical Officer, Dr. Malsawmtluanga chuan tui chhuan so in bakah ei leh in siam nan a hmang thin turin a chah a. Pem leh hliam neite chu fimkhur zual tur leh faina leh thianghlimna kawngah tan la thar turin a chah a ni. A. bik takin tui hmanna zawng zawngah tui chhuanso chauh hmang zel turin a chahin, Health Worker leh Medical Team - ten an thutchilh angin, tha taka enkawl chhunzawm zel an nih tur thu a tarlang nghal a ni.

Health Worker Pu ZD Vanlalhruaia chuan November ni 11 atang khan Medial Team -ten an awmchilh tawh thu a tarlang a. Hri vei mi 90 buaipui tawh niin, mi- 84 in an kai tawh a ni, a ti . VC leh NGO - ten an thawhpui tha hle tih sawiin, in lenpawh kawngah tan lak a la ngai hle a ti a. Hri vei tam ber chu ek In nei mumal lo an nih thu a sawi a, faina leh thianghlimna kawngah inzirtirna tha taka neih a nih thu a tarlang bawk. Thihpui te pawh damdawi eitha lo an nih thu tarlangin, tun dinhmunah mi pali enkawl mek an awm a ni, a ti.

Kakichhuah hi In - 130 awmna khua niin, November ni 4 khan tui hri nia hriat hi a leng tih report dawn a ni a, mi 6 thiin a khaw mi 3 leh raltlan 3 an ni.

Lawngtlai district bawrhsap Pu Donny Lalruatsanga chuan Kakichhuah leh Hruitezawl a tuihri leng mek chuan a zia-awm tawh a ti a, he hri leng avang hian mi 9 an thi tawh.

Akahsvani News zawhna chhangin Lawngtlai bawrhsap chuan Kakichhuah an flawhna-ah kawthalo 4 chauh awm awm tawh thu leh hrileng dinhmun a zia-awm tawh thu a sawi a. Lawngtlai CMO pisa atangin medical team-in an thutchilh reng bakah World Health Organisation (WHO) leh Doctors without Borders mithiamte’n an awm chilh bawk thu a sawi. Kawthalo hri kai damlote sample leh an khaw tuikhur tui endik tura Zoram Medical College & Hospital laboratory a an thawn chu a la chhuak lo chungin natna hlauhawm lutuk ni lova mithiamte’n an ngaih thu leh enkawl hma chuan natna dam hma taka ngaih a nih thu a sawi.

He tih lai hian Siaha district-a Lodaw leh Lomasu khua-ah pawh tuihri ni a hriat kawthalo natna hi a leng a, mi 3-in an thihpui tawh a, he hri leng avanga Siaha leh Lawngtlai district a nunna chan zat chu an vaiin 9 an tling tawh. Lawngtlai leh Siaha a tuihri ni a rinhlelh leng hi Chin state chhimlam Myanmar ram chhung Paletwa bial a mi 300 chuangin an vei bawk avangin Mizoram chhung amite hi an rawn kai chhawng ni a rin a ni a. Hemi avang hian district bawhsap pahnihte chuan Myanmar ramri hi khar rih turin thupek an chhuah a ni.



MUSIC FESTIVAL

Tourism Minister Pu Lalnghinglova Hmar chuan Aizawlah December ni 15-23 chhungin Thlasik Kut (Winter Festival) buatsaih tum a nih thu a sawi.

Inrinni kallta zana Kawmzawl-a Rimawi Kutpui 'Leitlangpui Music Festival' 2025 kharna inkhawm a hmanpuinaah he thu hi sawiin Winter Festivalah chuan Krismas lam hawi a hun duan a, Krismas carol leh Krismas costume parade te buatsaih tum a nih thu te a sawi a. December ni 31-ah a huhovin Mizo thalaite tan Sakawrhmutuai Sunset programme buatsaih a, kum hlui ni tla thlir liam tum a nih thu a sawi a. Mizoramah kum hlui thlaha tourist hip thei turin ruahmanna siam a ni tiin, Mizorama khualzin tam zawk hip luh an nih theih nan Mizo thil ngaisang a, lawm a, chawi lar zel turin thalaite a chah.

Tourism Minister chuan Lunglei chu Mizoram rimawia sul sutu, Serkawn Concert lo chhuahna a nih angin Leitlangpui Music Festival pawh a par vul zel dawn a ni, a ti a. Mizo leh Mizo inlawm a, Mizo hla saa zai thup thup te, Mizo hla, zaithiam leh rimawi tum thiam ngaihsan te hi rimawi kutpui tihlawhtlingtu a ni tiin, Mizoram Tourism-in thang zel tura a mamawh a nih thu a sawi a. Mizoram hmun tina mite chu intlawn tawn sup sup a, hunpui leh hun bil buatsaih a, chumi kal tlang chuan tualchhung mite ipite-ah sum a luh a, ram eibar dinhmun (economy) chawi kan a nih chu Tourism-in a tum a nih thu sawiin, event tha, khualzin hip thei buatsaih zel tum a nih thu a sawi.

<><><>

PRESS DAY

Nimin kha National Press Day a ni a, Pathianni a nih avangin vawiinah he ni hi lawm a ni ang.

National Press Day lawmna hi Aizawlah chuan I&PR Auditorium-ah I&PR Secretary Pi Bethsy Zothanpari hova hman a ni dawn a. I&PR Director thar Pi K. Vanlalsangi kaihhruai inkhawmah hian thupui ‘The Role of Print Media in Digital Age’ tih thupui zirho a ni ang. Tun hnai a Dr Bhupen Hazarika National Award 2025 dawngtu I&PR director hlui leh IIMC regional director hlui Pu LR Sailo leh tun hnai a journalism lama doctorate hmu Pi Lalnunkimi Colney te chawimawina hun hman a ni bawh ang.

Lunglei-ah pawh district MJA-te’n National Press Day pual hian Press Club-ah hun an hmang dawn a. Lunglei district SP Pu J. Lalmuankima’n a hmanpui dawn a ni.

<><><>

MLA OATH-TAKING

Dampa Assembly bial bye-election-a thlan tlin Dr. R. Lalthangliana chu naktuk Thawhlejni hian MLA atan lakluh a ni dawn.

Dampa Bialtu MLA Pu Lalrintluanga Sailo, kumin July ni 21-a a thih avanga Dampa biala tun thla ni 11- a by-election inthlan vote thlakah khan MNF candidate Dr. R. Lalthangliana chu thlan tlin a ni a. Mizoram legislative assembly member atana lakluh ni atan naktuk, Thawhlejni chu ruat niin, chawhma dar 11:00 ah Assembly Conference Hall, Annexe Building-ah Assembly Speaker Pu Lalbiakzama chuan rinawmna thuthiam tirin MLA atan a la lut ang.

Dr R. Lalthangliana hian kum 1986-ah MNF Party zawmin party chhungah nihna hrang hrang chelhin tunah hian Sr. Vice President ni lai a ni a,

Term ruk zet MLA ni tawhin Lunglei North bialah a zâwnin vawi 5 chhûng MLA ah thlan tlin a ni a, South Tuipui (Hnahthial) bialah vawi khat tlingin Mizoram MLA zingah chatlak awm lova mahni biala tling rei ber a ni. Term 6 chhung MLA a nih lai hian Cabinet Minister term thum a chelh a, hengah hian Department hrang hrang enkawlin hna alo thawk tawh a. Tunah hian Dampa bialah thlan tlin leh niin hei hi a vawi 7 MLA nihna tur a ni dawn a ni.

<><><>

BIOMETRIC ENROLMENT

Mizorama awm mek Myanmar raltlante mit-naute leh kutze-thla lak hna kal zelah raltlan awm zawng zawng zahve aia tam chhinchhiah an ni tawh.

Home department hotute hnen atanga thu dawn danin kumin July thla tawp lam atanga biometric enrolment kalpui-ah Zirtawpni thleng khan raltlan awm mek 31,621 zinga 17,864 chu an mit-naute leh kutze thla la a chhinchhiah an ni tawh a. Hei hi za zela 56 point 49 a tling tawh a ni. Harsatna chi hrang hrang, internet tha lo leh biometric enrolment lakkhawmna hmanrua a harsatna a awm chungin kalpui chhoh zel a ni a. He hna thawh zawh hun atan hian hun bi tiam chiah chu a awm lo niin home department hotute chuan an sawi a ni. Mizorama Myanmar raltlan awm zat hi a pangngai reng lova, a changin an tam a, a changin a tlem a. A chhan chu lo luh belh an awm chang a awm a, an rama kir leh emaw Mizoram pawn lama chhuak emaw an awm reng vang a nih thu an sawi.

Biometric enrolment kalpui a nih chuan hian an dinhmun, an hming, nu leh pa hming, an lokalna khua leh hriat tur pawimawh dang lakkhawm (biographic enrolment) pawh kalpui nawn leh a ni a. Relief camp a awm leh chhung khat laina leh thiante bel bakah mahni in luaha awmte zingah pawh an thalai hmun danga lehkha zirte an awm avangin biometric enrolment kalpui hi a awlai lo hle niin district hrang hranga he hna thawktute chuan an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

NIA

National Investigation Agency (NIA) chuan Red Fort-a Car puak an chhuinaah hlawhtlinna ropui tak changin mawhphurtute zinga pakhat nimin khan an man. NIA te hian Kashmir-a khawsa Amir Rashid Ali chu Delhi-ah manin Rashid Ali hi Red Fort-a thihchilh bomb ti puaktu Umar Nabi nen inthurual nia hriat a ni a. Pawikhawihna atana hman car khka Amir Rashid Ali hming hian register a ni a. NIA te hian Ali-a kut atang hian lirthei dang an man tel bawk a ni.

NIA te chuan he pawikhawihna an chhui mekah mita hmutu mi 73 an kawm tawh a, hliam tuarte pawh an kawm tawh bawk a. NIA te hi Delhi Police, Jammu and Kashmir Police, Haryana Police, UP Police leh agency dangte nen an thawkho a ni.

<><><>

EAM

External Affairs Minister Dr.S. Jaishankar-a chuan Amir Of Qatar, Tamim bin Hamad Al Thani chu Doha khawpuiah a kawm. Dr.Jaishankara hian Prime Minister Narendra Modia aiawha chibai bukin Indai leh Qatar inlaichinna that zel theih nan theihtawp chhuah a tiam a. Amir of Qatar kaihhruaina hnuaiah inlaichinna ti lian zel tur leh thawhdunna thar zawn zel a duh thu a sawi.

Dr.Jaishankar-a hian Qatar Prime Minister leh Foreign Minister Mohammed bin Abdulrahman Al Thani a kawm bawk a

<><><>